

## **Communicaziun allas medias digl cumegn da Surses (nr. 01-2019)**

### **Surses: Surses promova la purscheida d'alloschamaint**

**Igl cumegn da Surses sustigna igl project per la construcziun d'en hotel e d'en resort da vacanzas a Savognin. Cun gronda pluralitad ò la radunanza communal concedia allas dumondas da dus sviluppaders da projects per sustign. Igl sustign vign concedia an furma da contribuziuns da promoziun à fonds perdu. La somma d'investiziun digls dus projects planisos monta an tot a radond 50 anfignen 60 milliuns francs.**

La radunanza communal Surses è s'externada cleramaintg per igl sustign da dus projects turistics. D'ena vart è nia approvo ena contribuziun da promoziun da max. 1.4 milliuns francs per l'erecziun d'en hotel e da l'otra vart ena contribuziun da promoziun da max. 1.65 milliuns francs per l'erecziun d'en resort da vacanzas. Igl dus projects independents l'egn da l'oter èn planisos sen ena parcella da biagier digl cumegn da Surses a Savognin. La radunanza communal ò er concedia agls sviluppaders digls projects igls dretgs da compra pigl taragn basiglevel.

#### **Project per «hotel Mövenpick Viols»**

Sviluppadra digl project d'hotel è la Panorama Development SA, cun sedia a Coira, davos la quala stattan quatter investours svizzers cun experientscha segl svilup da projects turistics. Igl hotel da 4 steilas planiso cumpeglia 108 tgombras cun radond 240 letgs, diversas ustareias ed ena partiziun da wellness, tgi sa drezza agls basigns digls giasts da hotel. Scu gestiunara digl hotel ins ò pudia liier cun contract la «Mövenpick Hotels & Resorts», tgi appartigna davent digl aton passo alla grupp «ACCOR». Mövenpick è ena marca da renom internaziunal, tgi vign a purtar aint la sia gronda experientscha internaziunala, per francar Savognin da moda persistente sen la carta turistica cun ena purscheida multifara per famiglias, sportists da stad e d'anviern, scu er per ameis dalla nateira. Tar igl hotel a Savognin sa tractigl dig amprem «Mountain-Resort» da Mövenpick an Europa.

La somma d'investiziun per la construcziun digl hotel vign stimada tenor igl stand da planisaziun dad oz a radond 28 milliuns francs. L'avertura è planisada sen la midada digl onn 2020/21.

#### **Project per «resort da vacanzas Viols»**

Per igl svilup digl project digl resort da vacanzas è responsabla la RESalpina GmbH domicileida a Breil/Brigels, tgi è spezialisada sen igl svilup e la realisaziun da projects turistics ainten las regiuns da muntogna. Igl resort da vacanzas planiso cumpeglia ena tgesa da menaschi e 5 tgesas cun radond 80 abitaziuns da vacanzas da 2 ½, 3 ½, 4 ½ e 5 tgombras, cun total radond 460 letgs. Pianavant sa cattan aint igl resort en en sectour da SPA e da wellness. Tar la planisaziun pò la societad far sa basar sen las experientschas fatgas tranter oter tar igl resort Pradas a Breil, tgi vign mano siva digl 2015 cun success.

La somma d'investiziun per la construcziun digl resort da vacanzas vign stimada sen radond 33 milliuns francs. Cun l'approvaziun dalla contribuziun da promoziun e la concessiun digl dretg da compra vign la planisaziun digl resort intensivada cun la fegnameira da darveir igl resort igl 2021.

#### **Ulteriouras decisiuns**

La radunanza communal ò approvo unanimamaintg igl contract da dretg da biagier cun igl Club da ballape Surses per la piazza da ballape a Tinizong cun ena dirada da 30 onns. Gl'on passo ò igl club sano la piazza da ballape. Per survagneir ena contribuziun digl cantun ve digls costs dalla sanaziun è nia pretendia da far en contract da dretg da biagier correspondent.

Cun gronda pluralitad ò la radunanza communal approvo pinavant la compra d'en bagn immobigliar dalla posta a Beiva e concedia igl credit supplementar basigneverl persiva da fr. 400'000.00. La pussebladad da compra è sa dada siva tgi igl uffezi postal da Beiva è nia saro. Igl cumegn ò da metter a disposiziun lis adattos per las farmadas d'autos da posta ainten las singulas vischnancas. Cunchegl tgi igl li digl bagn immobigliar è optimal, è la compra neida considerata scu stategicamaintg impurtanta.

Unanimamaintg ò la radunanza communal er approvo la revisiun parziala dalla lescha da natiralisaziun communal. Chella revisiun è stada necessaria perveia dalla revisiun totala dalla lescha digl dretg da vischinadi dalla confederaziun e digl cantun.

Ulteriouras infurmaziuns dat igl mastral Leo Thomann (telefonign 079 405 96 73)

Tinizong, igls 18 da mars 2019